

橫浦先生文集

十二





橫浦先生文集卷之二十

祭文

祭呂居仁舍人

嗚呼聖學不傳何啻千載吟哦風月組繡文字
轉相祖述謂此極致正心脩身不復掛齒孰如
公師友淵源文以宣之詩以詠之天下之士
 誦公之文服公之詩者多矣而得公之意者蓋
 未見其一二也若乃勸講露門直筆太史代言
 西掖視草北門即公之忠正恭儉躬行履歷至
 死不亂者粲之於英華而注之於筆削爾我之
 識公最晚而公之知我最深同處于朝而不相
 往來同好此學而未嘗談論神交默契不欺不
 愧其亦庶幾焉嗚呼萬事已矣夫復何言觴酒
 豆肉千里寓哀惟英靈其享之

祭虞深之

嗚呼深之公之為人篤於中外信於朋友寬以
 臨民禮以待士遇事不感應變無窮識利害之
 所歸知終始之必爾如著龜之先見如軒鑑之
 清明挾此之材用此之德以年則當享上壽以
 官則當位大夫今官止於一簿年不滿六十一



病不復竟成永訣嗚呼痛哉我之與公始於學校之舊終爲姻婭之親情同弟昆義均休戚我竄嶺下交親邈然隻影自憐斷蓬無托凜平淮公兩遣問勞書詞懇惻藥物豐備今則已矣尚何言哉回思孀妹遠憐孤兒痛徹于心其誰我慰生芻之奠一寫哀號

祭王侍郎

惟公才出人上學自名家推賢揚善掩過匿瑕昔其未見諸公交稱流離偃蹇欲識未能南來嶺下門設雀羅交親斷絕形影莫過公持帥節惠然見臨論議忠厚器宇靚深謂必遠大少究所施天理莫測而止於斯若其踐揚履歷獻納論思不抗不抑匪亟匪遲顧我老病百念如灰期公還朝或慰衰頹今其已矣有涕漣沍觴酒豆肉庶或享之

祭鄭仲遠

公有治民之才有華國之文有深遠之度有竒詭之策而議論剛正人物軒昂謂必居諫官御史之貲西掖北門之職而年未登五十官止於九品位不過縣令百未一施冒疾而死嗚呼哀

哉堂有老母室有寡孤流離顛沛以至於此嗚呼哀哉念我與君義乃同年情如兄弟不見顏色僅過年餘平生之歡終天之訣嗚呼哀哉病不及知歛不及哭觴豆之奠遠致老懷公如有知庶或享之

祭解帥

惟公剛而能審武而好文老而不變幼則有聞憶我平生初未識君謫居橫浦乃挹清芬樽酒相樂談辭如雲酒酣耳熱氣凌三軍倒廩傾困兩忘主賓嵐瘴所都飲冷食新日損月削病輒彌旬竟至不起嗟誰與親君居藍田死乃江濱首丘弗獲藁葬此辰肉馨而絜酒醇以清能復享此有淚濡巾

祭黃元寵

惟公器質冲厚志氣剛方見於議論絜於文章諫官御史給舍臺郎謂當平步翻然翱翔而官止貞郎位止半刺年不至上壽乃遽至於云亡嗚呼哀哉嗟我寡與生平坎軻謫居嶺下門莫我過公來分教見我驚嗟情均骨肉義期切磋公將滿去謂圖復來得倅五羊北轅又回今年

正月迂吏前催私竊自喜我懷當開戒飭僕奴
洗豆陳盃日月已屆何久徘徊事出意外訃音
告哀淚落如雨哭聲如雷此生已矣此心亦灰
有肉登俎有酒在壘千里致奠魂兮來哉

祭史幾先

嗚呼幾先勤以律已儉以成家語人以信出言
無譁鄉閭之所宗仰君子謂之無瑕惟我與公
心實相知我謫于南三惠以書懇勲問勞語畢
嗟吁今我北歸意則無喜謂當與公一盃相囑
優游卒歲林下笑傲此意未遂公則已亡訃音
來告老淚滿鬚聞公有子力學未已當大公門
少遂公志薄殽在俎清酒一卮公如有靈庶其
享之

祭彥執

嗚呼彥執遽至此耶公生不娶至于絕嗣嗚呼
痛哉不幸有伯牛之疾有原憲之貧而氣干斗
牛文摘雲錦行絜冰霜識高今古不得一官終
於老死茲又可爲天下惜也余素寡交生平朋
友不過四人姚葉先亡公繼已去予形單影隻
有唱無和有言無聽有酒無徒有花無玩余之

悲苦當如何耶人生大化如彼浮萍適然相值適然而散亦復奚喜亦復奚悲其所悲者以公之才而不顯於世以公之德而至於無後觴酒豆肉千里致奠嗚呼痛哉

祭墳園神

某年月日以酒脯之奠昭告于家園土地林木等神某讀喪親篇曰卜其宅兆而安厝之嗚呼言之至此五內糜裂尚忍言之耶某卜葬先人於此今將開壙謹用告虔某身為儒者當信先王之言不當信淫巫瞽史之說嘗讀周官墓人之職曰先王之葬居中以昭穆爲先凡諸侯居左右以前卿大夫士居後各以其職此先王陪葬之法也驗吾先王左右前後之說則夫陰陽家流青龍白虎獨火太歲之說敗矣又讀記禮之說曰夏后氏尚黑大事斂用昏商人尚白大事斂用日中驗吾先王用昏之說則夫陰陽家流乾艮一時之說敗矣又讀富辰之言曰管蔡郕霍魯衛毛聃郟雍曹滕畢原酈郇文之昭也邾晉應韓武之穆也樊蔣邢茅胙祭周公之嗣也驗吾先王一宗數姓之說則夫陰陽家流五姓宮商角

社羽之說敗矣又讀春秋書曰宣公八年十月
己丑葬我小君恭嬴雨不克葬庚寅日中而克
葬驗吾先王己丑庚寅以雨晴爲候之說則夫
陰陽家流擇日定時之說敗矣以至攷五月三
月之說則年辰畏忌之說敗矣攷從柩臨穴之
說則黑黃衝射之說敗矣是陰陽家說違悖義
理舉不足信又嘗攷先王之說曰執左道以亂
政殺假於鬼神時日卜筮以疑衆殺又曰非聖
人者無法非孝者無親今陰陽家譎怪之說是
左道亂政也是假於鬼神時日卜筮以疑衆也
是無親也是非聖人也公犯先王明禁罪在不
赦動以吉凶禍福爲言以恐動天下以起不孝
之心嗚呼葬親而欲徼福於無知之神此何心
也哉此不孝之甚者也甚甚悲之使世無青龍
白虎之神獨火太歲之神則已如其有之必不
垂祐於謀葬其親避忌畏惡遲延歲月以徼福
於一身之人不孝之子矣何以知之石駘仲卒
無適子有庶子六人卜所以爲後者曰沐浴佩
玉則兆五人者皆沐浴佩玉石祁子曰孰有執
親之喪而沐浴佩王者乎不沐浴佩玉石祁子

非人皆以龜爲有知也豈有爲青龍白虎獨火
太歲之神反不如一龜之有知乎先王之道本
諸身施諸庶民攷之三王而不謬建諸天地而
不悖質諸鬼神而無疑某今葬其親以義合禮
安敢不以先王之道爲法耶又安敢不以先王
之道正鬼神耶某又觀先王蜡祭之法曰迎猫
爲其食田鼠也迎虎爲其食田豕也今以葬先
人斬伐林木斲掘土膏雖幽冥中念人子之心
不以爲忌而某所以事鬼神者亦安敢不以禮
義而再拜告也嗚呼先王之道神明知之久矣

區區之言非特正淫巫瞽史之說將以開先王
之道使爲人子者以奉其親以事鬼神以窮後
世紛紛之論不敢以吉凶禍福動其意而一以
純孝爲心神如有靈庶或相之

祭靈潭龍君

維紹興十八年歲次戊辰六月丁亥朔十五日
辛丑具位張某謹以酒果之奠敢昭告于靈潭
龍君之靈某謫居于此雖無職事而月有俸廩
歲有衣賜啖食邦民膏血每懷愧畏乃至五六
月不雨田苗就槁亦用嗷嗷不寧聞邦人迎請

龍君而龍君惠然肯來來未一日於炎赫中沛以甘雨越明日又雨夜乃大雨歡聲動地良用欽慕竊思龍君處幽就曠不求人知又未嘗作禍作福以恐動此邦之民超然與世相絕此邦平時無香火之奉一有旱乾之苦無所控告輒相與致禱而君初不以平日爲懷應其所求霑足優渥千倉萬箱上以供百官有司之奉下使家人婦子驩欣怡愉以享終歲之飽焉而君方撝而不有復退藏於寂寞深渺之中民亦忘君之賜自以爲吾耕墾之功爾嗚呼君乎其亦可謂賢矣某食君之祿衣君之衣官列侍從位上大夫而退思平生無分毫利澤以補斯民是以私有愧於國家而仰慕龍君之德謹以區區薄奠少見意焉

到任祭文宣王

猥奉宸綸起臨是郡視事云初躬謁廟貌將行所學以濟斯民敬事而信不忘先訓

祭本衙土地

叨竊郡寄老稚在焉惟神庇之蟲鼠蛇虺有害于人悉屏勿見乃神之休

墓銘

廖守墓誌銘

紹興乙亥四月朔有持書扣門者其書題曰孤子廖顥余啓封疾讀曰顥不孝先考故新州太守也有賢行應書法不肖嗣欽聞先生謹許可其言足以信今傳後敢以葉大任大夫所書行實以請願先生叙而爲銘豈惟不肖嗣之幸抑亦先太守之幸惟先生哀憐之余考葉大夫所書叙之曰公諱某字某世爲連州桂陽人曾祖某祖某隱德不仕考某以公故累贈右中散大夫公以紹興十九年四月卒享年七十有三其入仕也以舍法兩上魁貢權州教授移州以使者薦授德州文學就權司戶曹事以破蠻功改承奉郎循州司錄以破賊功遷承事宣義郎知廣州東莞縣又以循州功特差知循州以年勞遷宣教郎以單恩轉通直奉議郎又以年勞遷右承議郎請祠歸鄉里遷右朝奉郎知潯州移知新州顥通籍金閨遇郊贈右朝請郎其爲教官也喻以彛倫勉以忠孝新民化焉其司戶曹也安化羣蠻掩不備夜半到城下吏民驚

竄無餘公慨然佐郡守拒之宜融二州適二百
許人負米來輸駐城外數十里公單馬出城引
入為援分城東西聲喏相應蠻驚且疑乘其不
意渠魁授首餘衆破散邊境以安其攝循州也
虔寇劉花何花陳長者踵跡相躡出沒循梅潮
惠間四郡騷然不寧承平日久人不知兵公集
僚佐問計策率愕眙相顧暗不吐一辭乃以郡
事屬僚掾躬率官兵出城討之部使者壯其行
委以督捕公指蹤戰士廣設方略歷崎嶇披蓬
藿與衆同甘苦備辛酸將士彌厲羣寇以平其
宰東莞則厲廉儉崇信義興學校決滯訟治效
為一路冠再守循州則嚴威信篤惠愛蠲逋負
治城池脩器械號令分明常若寇至于今賴焉
兵官訓練嚴酷士卒苦之指日作亂公呼羣卒
立庭下且呼兵官來曰汝何為不撫士卒又厲
羣卒曰汝果欲為亂耶無它殺殺吾一人足矣
羣卒泣且拜曰我以公故不敢有它心已乃至
教場立程格卒以無事此皆可書者也其為人
孝悌慈祥寬厚靜謹平居恂恂長者也遇不可
則慷慨直前無所顧望其於榮利泊如也異時

在東莞部使者列薦召審察都堂除提點九路
坑冶辭燕瑛尹開封薦司儀曹又辭自潯州來
不計年勞不叙賞典曰吾布衣至此足矣歷三
郡不受供給遇水旱不受圭租曰民艱窘吾何
忍乎真仁人君子之所爲矣妣黃氏贈令人前
娶唐氏贈安人再娶陶氏封安人商翁孫女也
治閩內以禮遇親族以恩撫愛子孫前後如一
紹興二十四年五月亦棄諸孤以歿男二人顯
瑣應擢進士第左承議郎通判欽州次頑先公
卒女三人長適進士鄧林次黃煥次早夭男孫
四人曰應清以公致仕恩補將仕郎餘尚幼女
孫五人顯紹興二十年八月葬于萬石岡之原
禮也顯前年謁余於大庾嶺下藹然君子也其
有父風乎銘曰

宗族鄉黨 曰孝曰弟 所臨有聲
所居可記 凡百君子 邈無一二
公獨有之 死亦奚喟

黃吏部墓誌銘

政和中福唐黃先生爲杭州教官余時居鄉校
爲諸生實在先生座下其爲人氣貌莊重性資

寬仁望其容儼然有不可犯之色聽其言周旋
勤懇循循然進人於善余甚敬之自先生秩滿
不相見凡二十年每思天下士大夫爲善人君
子者先生未嘗不經余心紹興八年余忝爲禮
部侍郎先生時爲吏部郎官間相過仁心義色
肅然郁然如昔日也一日先生見過喑不吐一
辭若有不相悅者余避席前曰先生無恙否若
有憂色何也先生曰吾何憂哉吾聞子一事爲
子憂耳余驚起曰所聞者何事願請教曰某文
字公豈當作耶余對曰實不曾作先生曰是公
職事如何不作余曰朝廷不以見委某亦不問
也先生微笑曰如此則吾心無憂矣遂大笑而
去少頃送茶一夸橄欖十顆來曰適所云果不
曾作某甚喜偶家信到有此二物輒爲一笑余
感激之甚曰使師友人人如黃先生日在吾左
右前後切瑳琢磨吾何憂不爲善人君子哉嗚
呼余今老且病悠悠度日不教不學先生亡矣
余晚節末路於何攷德而問業乎余所以悲也
以余所已知遡余所未知以先生所已試遡先
生所未試使天假之年必將任重致遠卓然爲

有宋名臣惜乎終於郎官而死也言之使人泣
涕紹興戊寅九月七日先生之子濬以其宗人
右司員外郎黃祖舜狀其行實來請銘云先生
諱珪字元功曾祖植曾祖母陳氏祖鄭祖母陳
氏父臻累贈奉議郎母徐氏累贈安人自上世
居福州永福縣新豐里白面村舉鄉無儒冠者
祖母每陋其俗一日慨然有孟母擇鄰之意謀
去故居遂徙候官之赤岸家焉先生皇考因得
挾策從人既長讀書爲文能吟五七字律詩恂
恂豈弟鄉人稱其長者生三子皆登進士第先
生其長也年十九從司業李隲學未半歲超越
流輩隲竒之間語先生曰如子材器異日當爲
聞人一第何足道也暨游鄉校籍籍有聲崇寧
貢于辟雍升補太學內舍與諸生羣試屢居甲
乙三舍法諸生每歲以季試優劣爲考察有上
中下之別而上舍亦分爲三等內舍生入二上
者即賜第謂之釋褐先生政和元年校試已在
選中偶有旨皆赴明年殿試復中乙科注官爲
襄州司理參軍旋爲衢州州學教授三衢士多
俊秀先生訓導啓發之甚至一時中第者獨多

於二浙中書侍郎馮公熙載尚書毛公友皆衢人賢先生之爲共薦延之終更循從政郎除杭州州學教授其教人如在三衢時士皆勵志於學自是生徒相繼取巍科如沈待制晦舍人凌景夏會三舍法罷先生亦以溢負解去從辟爲鹽官縣丞先是方臘竊發於睦州攻掠旁郡賊平新復郡邑給復二年并住賣鹽鹽官亦預其數後鹽法復行適當歲饑爲令者務趣辦以爲己功詎令人戶請買尋責其價急於星火帥府知其擾改以屬先生先生曰急疲民以悅上官吾何能爲於是盡呼邑之父老告諭之曰有司特此以供公上固不可蠲吾將寬若程督免若追胥若曹亦樂輸耶邑人皆曰戴公之德敢不赴期踰月而辦秩滿薦者應格改宣教郎除汾州衛州教授皆以親老地遠不能赴廟堂有知先生者欲以爲衛尉寺丞先生語於朝曰寺監丞簿乃異日晉用之資地第偏親垂白若得一官稍近鄉閭不廢甘旨之奉乃所願也當路善先生語誠即除福建路提舉茶鹽司幹辦公事官居富沙仍就見次時仲弟琳爲邵武軍司戶

參軍相距數舍板輿往來頗盡親歡俄丁外艱
既除而仲弟亡遂無仕進意親舊躬曉之勉彊
造朝時中書舍人林公適禮部侍郎李公正民
交薦之除主管官告院改大理寺丞紹興四年
之任在官二年擢監察御史未數月除刑部郎
明年遷吏部九年四月十四日以疾終于行在
之官舍享年若干積官至左朝請郎十年八月
壬申朔葬于報恩寺山先塋之西妻蔡氏封安
人子濬右承務郎新知興化軍僊遊縣女適進
士陳壽隆先生天性純孝於兄弟尤篤友愛平
居一日不相面則惘然若有所失其仕進不屑
就不苟合亦不爲崖異之行官杭日外臺有緣
官寺進者欲薦先生先生曰固願出門下今舉
狀幸已滿負乞回此以錄寒士雖辭之甚力然
其言婉遜亦未嘗以語人公嗜學不倦自登第
以至踐歷臺省無一日廢書上自諸經下至諸
子百家之言無不研究搢紳稱其博洽嘗謂季
弟琇曰大學所謂誠其意者毋自欺也吾兄弟
素習禮經盍佩而行之平昔所寓必大書誠意
正心四字於座右以效古人盤盂几杖之戒此

皆黃公狀其行也先生重於義而輕於利其在
吏部也時中執法與之相好使所親語之曰將
屈公再入臺中如何先生正色對之曰起居中
丞某人小人也乃班從官首某人小人也乃班
庶官首中丞日造庭中見此二人汗人眼目亂
吾風教敗人名節如何不擊去如某輩安用嗚
呼使先生不死其排斥小人保護君子無疑矣
先生於朋友無不盡其歡心平居暇日婆娑嬉
遊笑談戲劇若將無不可者及朋友微有害理
則正色斥之使人心寒而股慄故人皆樂其誠
而畏其正余知先生自謂不後於黃右司銘其
可辭耶銘曰

和而克莊

嚴而靡忒

君子之容

君子之德

吁嗟先生

爲百世則

陳氏考妣墓銘

紹興二十五年六月二十有二日余同年友陳
開祖有書來余喜甚及閱其封緘曰孤哀子余
投袂而起曰嗚呼開祖孝於其母今母氏不幸
耶不知其何以堪之灑涕開緘曰一鸚不孝慈
母棄諸孤日月有時將葬矣嗚呼尚忍言之耶

吾母有賢行應銘法願先生銘之又曰一鶚不
孝早失所怙未銘也敢并以請先生知我深今
輒以行狀聞諸下執事惟先生悲哀之使吾考
妣受先生賜而不肖嗣如一鶚等所以受賜於
先生者亦豈有紀哉今讀其狀曰陳氏世爲閩
人先祖來游永嘉因家焉遂爲永嘉人先考奉
議風姿粹美襟度夷曠見人傾倒輒盡喜賓客
篤故舊口不言人過閑居葺屋榭蒔花木與朋
友賦詩飲酒無虛日也樂調人之急求則與之
不留爲後日計友愛二弟如同母生平居笑語
怡怡終其身未嘗失色年纔四十而卒里黨莫
不哀之實政和五年正月乙亥明年正月己丑
葬于郡之吹臺鄉干嶼之原紹興丙寅郊祀以
一鶚升朝錫恩贈右承事郎三封至右奉議郎
娶同郡潘氏封太安人太安人曾祖大方祖宗
臣父叔齊皆隱德不仕寡居時年踰三十諸子
幼太安人獨當家務經紀有條理歷艱難辛苦
無厭色日遣諸子就學寒暑不少懈性嚴重不
妄言笑處事有體議論時援經旨以喻從二子
赴官常在窻隙視其決事杖有罪者或遇太安

人則怒而詰之事有不如意未嘗形色辭間有疾懼貽家人憂隱忍不以告諸婢有過不施鞭朴以理訓飭而已平生不奉佛不信陰陽方術之書不惑荒幻竒譎之說毅然若篤道君子也生三子長一鷄左朝散郎通判紹興軍府事次亨朝左奉議郎知福州長溪縣事次一夔業進士五女長適鄉先生沈琪次適進士鄭熙績次適左奉議郎通判宣州軍州事沈大廉次適進士王宗彥次適進士劉源孫十人自強自存自誠自脩自治自明自牧自省自勝自得皆業進士孫女八人長適進士沈辰次適進士章諶次適左迪功郎婺州司戶參軍鄭伯熊餘在室太安人之在長溪一夔留永嘉一旦得暴疾以卒諸子念曰一夔安人素所鍾愛儻以實告必悲苦將有意外憂泣戒勿言嗚呼天奪吾母耶踰年忽聞之竟憂泣成疾以至不起嗚呼痛哉紹興乙亥二月己丑卒于官舍享年七十有六臨終精爽不亂笑語如平時二孤護其柩以歸將以明年二月合葬焉初先祖來永嘉生事微甚已而積累至于溫暖旣捐館奉議年加長踈財

重義日與賢士大夫遊從延師教子弟聚書籍以自娛又散其餘貲與道人釋子輩率以萬數繇是生計不復往昔矣太安人區處盡力躬以儉約力教二子見其成就內外親黨五十許人誕日奉觴上壽環列左右肅雍可觀享其佚樂者二十餘年余讀已乃歎曰嗚呼陳氏夫婦亦賢矣哉退而考其祖蓋諱晞顏字某奉議諱豫字謙仲吾開祖博極羣書而一意於聖學平居晬然遇事輒斷不可屈以勢其亦有自來矣銘不可辭也乃銘曰

種德惟寬

斂德以勤

寬積諸幽

勤更孔艱

猗歟奉議

寬而教子

勤哉安人

淑謹且均

施也必報

厥命日新

鶚倅畿甸

腰銀服茜

朝宰大邑

金閨通籍

並登賢科

學準聖域

安人享之

斂種以德

凡厥有家

其謹視之

謂予不信

攷此銘詩

龔夫人墓誌銘

紹興癸丑九月余再娶婺州浦江馬氏馬氏先

適義烏縣青口吳氏夫不幸馬氏守志不嫁余妻父妻母憫馬氏年少其子幼小曰吾老矣汝不再適吾死不瞑目遂以嫁余既成婚翌日吾妻面壁掩涕者終日余問之再三曰君志誠君子也妾不敢不以誠告妾吳氏姑高節懿行當於古列女中求妾欲與之同志弗克今已適君矣無可言者妾恐吾姑思念妾甚所以泣余聞之爲其戚然者終日因問其姑高節懿行若何曰吾姑姓龔氏世爲婺之義烏人適吳氏京生一子曰察察即妾前夫也察纔四歲而孤吾姑尚年少也吳氏大族皆以豪侈相尚吾姑曰吾今孀居當立家法以示子孫乃獨清儉廉介其遇族人莊而有恩其治家事嚴而不苛其待僕妾整而有禮合族數百口內外斬斬人無間言吾夫死有子曰克忠妾來歸父母家時詣堂下泣別吾姑呼妾使前曰汝今所嫁之夫名士也吾聞其名久矣恨未及識也汝謹事其夫如平日所以事吾者馬氏適余二年乃不幸其言歷歷在吾耳紹興丙子余守永嘉上章求閑得遂所請專往謁吳氏求龔夫人相見所以償吾妻

馬氏之志也上堂參拜瞻其顏色望其儀容藹然肅然真賢婦人也別來三年歲在戊寅五月十一日夫人以微疾而逝享年七十有四夫人初喪其子吾妻馬氏既適余執然一孫方七歲夫人亦已年高矣乃不以屑意乃卓然自勵曰吾當教此孫使之成立以大吾門克忠亦能副夫人意耿耿自立讀書爲學有志古人歲在癸酉鄉大夫薦之未獲所求克忠憂見於色夫人怡然笑曰汝勿以吾在介意也汝當益親賢師友使士君子皆稱汝爲賢者吾心足矣仕宦有命不可求也然則夫人之志爲如何哉夫人既沒將葬有期克忠使其子日休乞銘於余余記其實行退而考夫人曾祖文政祖待父宗諤夫人在家爲女時已有孝行可稱及適吳氏有姑及祖姑在堂夫人朝夕侍膳禮無違者夫其爲女爲婦爲姑皆克盡其道可謂賢矣以其年十月二十日葬于官塘之原先是其祖葬于野墅每歲苦暴水遂遷以合葬焉禮也女一人適陳安本乃故給事陳公次升之姪也曾孫男五人曰日休日思日省日行日宣皆舉進士曾孫女

四人長許適太學生葉維休三人尚幼乃爲之
銘曰

和而克莊

寬而不弛

是爲夫人之賢行

可以列之女史而不愧

橫浦先生文集卷之二十

施先生孟子發題

天生聖賢蓋將以祐斯文也故其所作必卓然有所建明余嘗竊怪夫自孔子沒諸子百家分散四起操觚牘挾徒黨駕其說於天下人人自以爲得聖人之道其說卒不明惟孟子一書乃與六經孔氏之說並傳世之學者至號之爲孔孟嗚呼何其盛也晚聞師說始知其立言之意果不與百家衆說同其論道德之旨果不詭於六經孔氏之說其所以有補於天下後世其功果不細而世之學者至號曰孔孟其說果不誣嗚呼天之生斯人也其果有意於斯文乎古人謂其書包羅天地揆叙萬類仁義道德性命禍福粲然靡所不載固也然私竊論之孟子有大功四孰謂大功四道性善一也明浩然之氣二也闢楊墨三也黜五霸而尊三王四也是四者發孔氏之所未談述六經之所不載遏邪說於橫流啓人心於方惑則余之所謂卓然建明者此其尤盛者乎自古聖人未嘗劇談性是以諸子之說紛然其間曰惡曰善曰混曰三品曰無分於善不善爭論四出要其歸皆以氣爲性者

也豈真識所謂氣哉孟子於衆說之中獨發之
曰人性善自孟子談人性善始覺天下之人皆
與天地等皆與堯舜等雖頑嚚猥瑣昏愚朴陋
皆得爲道德之歸與向之善惡之論者功用如
何哉此孟子所以爲知性之言而大有補於斯
人也然後世談性莫盛於釋氏釋氏談性明體
而不明用自喜怒哀樂以前釋氏宜知之喜怒哀
哀樂已發之後則釋氏置之不論此所以功用
爲缺然然則欲明性善乎正在喜怒哀樂之後
不然則寂然不動之時善惡安在孟子兼其用
而發之始覺四端之用沛然見於日用間堯舜
禹湯文武周孔之事業皆自此建立人性如此
古人未發也孟子獨發之此一大功也自古論
道德者自性命之理達之於父子君臣自治心
脩身推之於天下國家以至天地萬物幽明鬼
神何所不至特不言養氣孟子於衆說之中獨
論浩然之氣自孟子談浩然之氣始覺聖賢所
以爲聖賢以有此氣孰謂此氣外物不困者是
也有一物可困於吾則所存者喪矣所以爲聖
賢者如何亦有是氣也方充然自得於心雖不

可名狀要其爲物中正勇健廣大堅固故行之
於富貴富貴不能困之使淫行之於憂患憂患
不能困之使戚行之於聲色聲色不能困之使流
行之於威武威武不能困之使懼行之於事物
紛擾之地則事物紛擾不能困之使亂凡物之
自外至者雖雜然並進而吾之曾中卓然皆有
所主而非智力所及者曾子之大勇孟子之不
動心非以此氣存焉乎故曰至大至剛以直世
之人不明此氣往往認其氣血之彊以謂浩然
者於是以倨傲爲大以凌暴爲剛以悻悻者爲
直若然則世之凶人暴德皆得浩然之氣矣嗚
呼噫嘻孰能真識吾所謂直剛大之德乎則外
物不困而天理渾然故其氣之充於吾身也晬
然見於面盎然發於背沛然見於周旋動作之
間古人之大有爲於世者皆出於此其塞於天
地則日月爲之光明山川爲之秀發萬物爲之
繁滋祿祥疾癘爲之衰息其氣如此古人未發
也而孟子獨發之此又一大功也當戰國之時
斯道旣喪邪說並作於是有所謂縱橫之家有
所謂刑名之家有所謂楊墨之家縱橫之家翻

覆變詐舞一世於口舌之上而刑名之家深刻
慘毒納天下於刀鋸之下使當時之民沒身塗
炭水火之中而不能出實二家之爲至於楊墨
之家雖云其道過差然推其心亦本於爲善耳
比之二家豈不賢甚矣哉然孟子置二家不問
反區區於楊墨其故何哉蓋二家之失易見而
楊墨之禍難知譬若疾病然發狂悶亂惴惴若
不朝夕而未必能死膏肓之病四肢固無恙飲
食起居如平日此庸醫之所忽而倉公扁鵲之
所望而走也何則縱橫之家誰不知其翻覆之
惡刑名之家誰不知其慘毒之惡君子雖不問
終於破壞而已至於墨子之兼愛則近吾聖人
之仁楊氏之爲我則近吾聖人之義惟其在於
近似天下莫知其非此孟子不得不辨也且天
下之道莫大於君父君父之道隆則治之所由
起君父之道微則亂之所由生治亂之機實係
於此墨氏之道豈必無父推其兼愛之過必至
於無父楊氏之道豈必無君推其爲我之過必
至於無君君子知微知章知柔知剛推其所從
來極其所由往必至於此故孟子斷之曰無父


無君然後揚墨之失方明而異端之說方破使天下後世人倫不墮而天理以全此又一大功也聖人之門惟論一心術霸者之心術如何哉余嘗借威公而論之威公九合諸侯一正天下此五霸之雄也然當時狄伐衛力可救而不救又狄伐邢力可救而不救及衛之亡也率諸侯而城衛邢之亡也率諸侯而城邢不救於未亡之前乃城於已亡之後其設心以謂救亂之功小而存亡之功大故棄其難而成吾功聖人知其心故於救邢書曰齊侯宋師曹師次于聶北救邢以明齊侯實無救邢之心故擁衆而不進也未亡之前力可救而不救待其宗廟既已煨燼社稷既已顛覆人民既已塗炭乃徐起而收其存亡之功此何心哉公子慶父之亂魯國幾殆書曰齊仲孫來春秋或書來朝或書來聘或直書來諸侯以禮來則曰來朝大夫以禮來則曰來聘至直書來蓋不與其來也猶曰無禮云爾夫齊仲湫來寧魯難聖人曷爲不與其來蓋仲湫之來名爲寧魯難實欲窺魯耳何以知之威公問曰魯可取乎仲湫曰猶秉周禮聖人知

其心故書曰齊仲孫來夫魯之難仁人君子所以惻然動心者也威公乃外收寧難之名內實欲乘其危而取其國此何心哉苟爲不然司馬子魚何爲謂宋襄公曰齊威存三亡國以屬諸侯義士猶曰薄德由此觀之五霸之心可知矣孟子曰雞鳴而起孳孳爲善者舜之徒也雞鳴而起孳孳爲利者跖之徒也欲知舜跖之分無他利與善之間也夫舜跖之分雖小夫女子所能知至善利疑似雖明哲有不辨然則威公城楚丘以存衛城夷儀以存邢仲湫以存魯豈非仁人君子之事然其心爲利乎爲善乎將爲舜之徒乎抑爲跖之徒乎五霸之道如此然當時不知而惟五霸之爲貴故孟子斷之曰以德行仁者王以力假仁者霸而天下之心術正此又一大功也嗚呼堯舜之道自孔子傳之曾子曾子傳之子思子思傳之孟子自孟子得其傳然後孔子之道益尊而曾子子思之道益著其所以發明斯文開悟後世者至深矣顧余不敏何足以窺其髣髴是四者之功所聞於師說如此然則世之談孟子者孰不曰仁義而不知仁

義果何物也胡不於赤子入井之時識其所謂
人性善乎胡不於無不慊心之時識其所謂浩
然之氣乎胡不於其顛有泚之時識其所謂楊
墨之非乎胡不於齊王不忍穀觶之時識其所
謂王者之心而黜其霸者之心乎此皆聖人心
術之要孟子直指以示人學者於此了然能明
此心而存之以誠敬養之以持之窮之以學問
而漸磨之以師友則庶乎真識孟子之仁義矣
不然雖白首七篇之中猶曰未讀此書可也

海昌施先生隱君子也諱德操字彥執與

橫浦游從頗厚文章學問亦其輩流也病
廢而沒識者悲之生平論纂甚富未暇裒
錄偶得其孟子發題輒鈹木以廣其傳使
學者嘗此一齋亦可以知先生之大畧里
人郎曄晦之書于毅齋





每偶得其孟子發題願殺亦以廣其傳使

合格證

實地編號：1
江蘇省城市古籍印刷廠

地址：江蘇省金壇市
鳳凰路186號

電話：0519-2336389

郵編：213200

圖書在版編目(CIP)數據

橫浦先生文集〔宋〕張九成撰.—北京:北京圖書館出版社,2003.12

(中華再造善本)

ISBN 7-5013-2340-2

I. 橫… II. 張… III. ①古典詩歌—作品集—中國—南宋②古典散文—作品集—中國—南宋 IV. I214.422

中國版本圖書館CIP數據核字(2003)第105322號

ISBN 7-5013-2340-2



書名 橫浦先生文集(全十二冊)
著者 〔宋〕張九成 撰

出版 北京圖書館出版社(100034 北京市西城區文津街七號)
發行 Tel:(010)66151313 Fax:(010)66174391
E-mail: Bistxb@publicf.nlc.gov.cn
Website: www.nlcpress.com

印刷 金壇市古籍印刷廠

開本 八
印張 九〇·七五
版次 二〇〇三年十二月第一版第一次印刷
印數 一—二〇〇

書號 ISBN 7-5013-2340-2 / K·733
定價 二九一〇圓

